

Na osnovu člana 6. Poslovnika o radu Općinske izborne komisije Kakanj broj: 094A-8/16 od 02.03.2016. godine, Odluke Vijeća ministara Bosne i Hercegovine o proglašenju nastanka stanja prirodne ili druge nesreće na teritoriji Bosne i Hercegovine („Službeni glasnik BiH“, broj: 18/20), a u vezi sa odredbama Zakona o zaštiti stanovništva od zaraznih bolesti („Službene novine FBiH“ broj 29/05) u uvjetima prisutne pandemije COVID-19 koja po obimu, načinu i brzini širenja zaraze, smrtnosti i ukupnim posljedicama, predstavlja do sada nepoznatu pojavu i ozbiljnu javno zdravstvenu prijetnju u svijetu, te prisutnoj tendenciji kontinuiranog pogoršanja epidemiološke situacije u Bosni i Hercegovini, Općinska izborna komisija Kakanj je na 2. sjednici, održanoj 06.08.2020. godine donijela,

INSTRUKCIJU

o postupanju Općinske izborne komisije Kakanj u uvjetima pandemije COVID-19 i epidemiološke situacije u Bosni i Hercegovini

Član 1.

(Predmet)

Predmet ove instrukcije je usklađivanje procesa, uvjeta i organizacije rada Općinske izborne komisije Kakanj, u uvjetima pandemije COVID-19 i epidemiološke situacije u Bosni i Hercegovini.

Član 2.

(Preporuke nadležnih organa)

- (1) U Općinskoj izbornoj komisiji Kakanj obavezno je kontinuirano pridržavanje svih preporuka i naredbi koje su izdali nadležni federalni, kantonalni i općinski organi: Zavod za javno zdravstvo Federacije Bosne i Hercegovine, Federalna uprava civilne zaštite, Kantonalna uprava civilne zaštite ZDK i Općinski štab civilne zaštite Kakanj.
- (2) Obavezno je pridržavanje i primjena preporučenih općih higijenskih mjera zaštite u službenim radnim prostorijama Općinske izborne komisije Kakanj na nivou svakog člana.

Član 3.

(Korištenje zaštitne opreme i obavezno pranje ruku)

- (1) Svim članovima Općinske izborne komisije Kakanj i posjetiocima, naređuje se korištenje zaštitne opreme, odnosno zaštitnih maski u službenim prostorijama komisije.
- (2) Članovi koji u službenim prostorijama Općinske izborne komisije Kakanj tokom rada budu primijećeni bez zaštitne maske, odmah će biti upozoreni da je stave, a ukoliko istu nemaju, da je odmah nabave.

- (3) Svi članovi obavezni su često prati ruke dezinfekcijskim sredstvom na bazi alkohola ili sapunom i vodom u skladu sa preporukama nadležnih federalnih, kantonalnih i općinskih organa.

Član 4.

(Obaveze pri ulasku u službene prostorije Općinske izborne komisije Kakanj)

- (1) Prilikom ulaska u službene prostorije Općinske izborne komisije Kakanj, svi članovi komisije, kao i posjetioci, obavezni su:
- 1) Nositi zaštitnu masku,
 - 2) Stati i obrisati obuću na otirač natopljen dezinfekcionim sredstvom,
 - 3) Dezinfikovati ruke dezinfekcionim sredstvom;
- (2) Ulazak u prostorije Općinske izborne komisije Kakanj bez zaštitne maske nije dozvoljen.
- (3) Prilikom ulaska u službene prostorije Općinske izborne komisije potrebno je osigurati da se u istim istovremeno ne nalaze više od dva posjetioca.
- (4) U slučaju potrebe ulaska većeg broja posjetilaca u prostorije Općinske izborne komisije Kakanj, radi provođenja neophodnih izbornih aktivnosti, potrebno je osigurati da isti održavaju međusobnu udaljenost od najmanje 1,5m.

Član 5.

(Postupanje u slučaju pojave simptoma)

- (1) U slučaju pojave simptoma poput temperature, kašlja, respiratornih simptoma, malaksalosti ili gubitka okusa i mirisa, član Općinske izborne komisije Kakanj dužan je odmah i bez odlaganja obavijestiti predsjednika ili člana komisije putem telefona, ne sastajati se sa ostalim članovima komisije, te kontaktirati nadležnog doktora za dalja uputstva i postupanja.
- (2) Član komisije je dužan isto postupati i u slučaju simptoma kod članova porodice sa kojima je u kontaktu, odnosno članova zajedničkog domaćinstva.

Član 6.

(Postupanje u slučaju potvrde zaraze)

U slučaju potvrde zaraze COVID-19 član Općinske izborne komisije Kakanj je obavezan odmah obavijestiti predsjednika ili člana komisije putem telefona i ne sastajati se sa ostalim članovima.

Član 7.

(Održavanje fizičke distance)

U svim zajedničkim prostorijama Općinske izborne komisije Kakanj obavezno je održavanje preporučene fizičke distance od najmanje 1,5 m, te reduciranje svih nepotrebnih zadržavanja i okupljanja članova komisije kao i posjetilaca u službenim prostorijama.

Član 8.

(Prozračivanje i dezinfekcija službenih prostorija)

Potrebno je da se sve zajedničke prostorije (toalet, hodnik i kancelarijska prostorija) redovno čiste, prozračuju i dezinfikuju.

Član 9.

(Prijem pošte)

Ulazak dostavljača, kurira drugih institucija, predstavnika političkih stranaka u zgradu Općinske izborna komisije dozvoljen je uz obavezno nošenje zaštitne opreme (zaštitne maske).

Član 10.

(Obaveze članova)

Svi članovi su odgovorni za provođenje ove instrukcije kao i preporuka i naredbi federalnih, kantonalnih i općinskih organa.

Član 11.

(Stupanje na snagu i objava)

Ova instrukcija stupa na snagu narednog dana od dana donošenja i objaviti će se na oglasnoj ploči Općine Kakanj i internet stranici Općine Kakanj www.kakanj.gov.ba.

Broj: 094A-20/20
Kakanj, 06.08.2020.godine.

